

陶雲汀先生奏疏

奏疏卷四十六目錄

江督稿

安化陶澍

保舉道府州縣人員摺子

請借項修築圩堤摺子

覆奏跟緝挖堤首犯情形摺片

淮北辛卯鹽課奏銷摺子

請鼓勵辦理票鹽出力各員摺片

推廣淮北票鹽摺子

請飭湖廣總督查禁岸費摺片

運使陞署任滿請給實授摺子

籌修豐縣城橋暨碭山挑河摺子

丁憂守備仍請陞署摺片

審明出征官兵索擾毆斃人命分別定擬摺子

保舉道府州縣人員摺子

併清單

奏爲遵

旨保舉所屬江蘇安徽江西三省人員仰祈

聖鑒事竊臣准部咨欽奉

上諭直省道府廳州縣人員平日立品居心官聲輿論該督撫見聞所及隨時察看自必知之最悉著各於所屬中有實在潔已愛民誠心辦公衆口交稱者出具切實考語秉公具摺保奏數員候朕簡用該督撫務當各矢公忠據實保舉勿許稍有瞻徇冒濫等因欽此仰見我

皇上求材佐治期在得人之至意伏思人才綦難知  
人不易從古詢事考言必要諸底績誠以託之  
空言不如見諸行事之深切著明也茲蒙

聖主諭以各員平日立品居心官聲輿論督撫見聞  
易悉而考其實於潔已愛民誠心辦公斯真循  
名責實千古知人之準則矣臣所轄三省事務  
較繁用人尤亟遭際

盛時感激圖奮尙不乏人惟臣知識樛昧深恐闇於  
所舉連月以來再三慎重除河工各道廳另由  
河臣覈舉外其餘甫經得缺如新授贛南道李

象鵬吉安府知府李彥章九江府知府張寅皆  
才堪治理而未便遽行出考又如江寧府知府  
陞任惠潮嘉道趙炳言安慶府知府陞任雲南  
鹽法道劉韻珂在知府任內皆潔已辦公有爲  
有守人情愛戴業已陞授他省亦毋庸敘列所  
有現在堪勝保舉人員謹據臣所知確切出具  
考語繕具清單恭呈

御覽伏乞

皇上聖鑒謹

奏

道光十三年正月二十二日具

奏二月二十二日奉到

硃批單畱覽欽此

謹將保舉所屬江蘇安徽江西三省道府廳州  
縣各員出具切實考語繕具清單恭呈

御覽

計開

江南鹽巡道葆

謙

滿洲舉人現年五十四歲

質樸勤明實心實力能知體要

蘇松督糧道陶廷杰

貴州進士現年四十四歲

居心平正質實安詳足資表率

安徽蕪湖道郭承恩

山西進士現年五十九歲

明白安詳辦事穩洽

江西督糧道廖鴻藻

福建進士現年五十二歲

勤明幹練才識俱優能知政體

江西鹽法道余正煥

湖南進士現年五十九歲

器宇安詳淳明穩練

蘇州府知府劉鴻翺

山東進士現年四十九歲

勁直居心勤求民隱頗能整頓地方

安慶府知府胡調元

福建副榜現年四十八歲



器識瀏亮勤幹有爲

廬州府知府周天爵

山東進士現年五十九歲

用嚴爲治志在除莠安良

鳳陽府知府朱士達

江蘇進士現年五十九歲

勤明老練整飭有方

南昌府知府李本榆

山東進士現年六十六歲

老成端重足靖浮囂

南安府知府李廷錫

湖北進士現年三十六歲

精明幹練實心整頓地方感服

贛州府知府汪云任

安徽進士現年四十八歲

才識敏練勤幹有爲最稱得力之員

通州直隸州知州王錫蒲

山西進士現年五十五歲

歷練老成辦事穩實

海州直隸州知州王用賓

安徽進士現年四十八歲

精心果力遇事認真民情感服

泗州直隸州知州舒夢齡

湖南進士現年四十六歲

清勤穩練悃悃無華

江蘇金壇縣知縣姚瑩

安徽進士現年四十七歲

才識通明辦事幹練

安徽歙縣知縣金鼎壽

貴州進士現年五十五歲

居心平恕慈惠之師

江西南昌縣知縣石家紹

山西進士現年四十二歲

勤明篤實夙著循聲

道光十三年六月初五日准

吏部咨爲奏

聞事文選司案呈恭查道光十二年十二月遵

旨將各督撫保奏之員已經抄出到部者開單具奏

欽奉

硃筆點出

臣

部行文調取併聲明未經奏到各省俟

陸續彙齊後另行辦理等因在案茲除閩浙兩

廣各總督山西廣東各巡撫尙未奏到外所有  
直隸等省已經保奏陸續抄出到部者敬繕清  
單恭呈

御覽應將何員調取引

見伏候

欽定等因道光十三年五月初八日奉

旨此次各省督撫保舉人員所有圈出之直隸天津  
道李振翥等二十四員俱著吏部調取引見其現  
報丁憂之員著俟服闋後補行調取欽此相應開  
單知照該督撫遵

旨飭令該員等卽行領咨赴部引見毋得遲延可也須至咨者

計開

兩江總督陶澍保奏奉

硃筆圈出人員

江南鹽巡道調補山西歸綏道葆謙

江南蘇松督糧道陶廷杰

江西督糧道廖鴻藻

江蘇蘇州府知府陞授廣東南韶連道劉鴻翱

安徽安慶府知府胡調元

前據安徽巡撫鄧保舉奏具呈  
硃筆圈出尚未給咨到部

江西南昌府知府李本榆

江西南安府知府李廷錫

江蘇通州直隸州知州王錫浦

江蘇海州直隸州知州王用賓

安徽泗州直隸州知州舒夢齡

陞署調取引  
見尙未到部

江蘇金壇縣知縣姚瑩

安徽歙縣知縣金鼎壽

江西南昌縣知縣石家紹

請借項修築圩堤摺子

蘇撫  
會稿

奏爲六合縣屬雙城果盒二圩堤埂被水冲决民  
力捐修不足援案懇請借項奏辦分年攤還以  
資捍衛仰祈

聖鑒事竊江寧府屬六合縣境雙城果盒二圩堤埂  
爲附近各圩之保障道光十二年夏間江湖漲  
發被水冲决閘口損壞以致居民廬舍田畝悉  
皆淹漫當據該縣詳據業戶余志雲楊鳳山等  
以該二圩堤埂向係民間按照業食佃力自行  
加築今被水冲决二十餘段急需修築按段估

計共需椿木土方銀五千餘兩除勉力籌捐銀二千餘兩仍不敷銀三千餘兩呈懇援照道光四年江寧縣境沙洲圩借修之案借奏修築分年攤徵還款等情經該縣親往查勘雙城圩埂共長五千七百餘丈除毋庸幫築二千餘丈外內有駱家橋等三段冲決五十餘丈洗刷成塘毫無根腳應另築新埂一百餘丈又橫練樹等處冲決二十一畝應修長二百餘丈其餘三千二百餘丈均已坍卸薄削亦須加築必應速爲修整共需工料銀四千五百餘兩除各業戶奏



捐銀一千七百兩實請借銀二千八百兩又勘  
得果盒洲圩南首攔江大埂亘長十五里冲决  
三十餘丈必須另行繞築新埂九十餘丈其餘  
各埂雖有舊制均已冲坍亦須一律加高幫寬  
方保無虞計需銀一千餘兩除各業戶奏捐銀  
六百餘兩實請借銀五百兩詳由府道遞加勘  
覈移司當經藩司飭行府縣勸諭業戶自行捐  
足修辦旋據該府縣查覆該圩民等被水冲决  
困苦流離生計維艱所捐之項已屬力竭實在  
力難捐足應請借項奏辦乘時興修且可使口

食不周之戶藉工謀食由江寧藩司覆查屬實  
懇請援照道光四年江寧縣沙洲圩借修之案  
借項奏給修辦以保賦命詳請具

奏前來臣等伏查該縣應修圩埂爲保衛田疇要  
工旣經地方官勘明被水冲决自宜及時修築  
期獲有秋惟此項工程本應民間集貲修辦災  
歉之後民情困苦所有其估需銀五千餘兩除  
業民已捐銀二千餘兩其不敷銀三千三百兩  
無力湊辦係屬實在情形合無仰懇

皇上天恩俯准在於司庫銀款照數借撥俾得乘此

春初水涸農隙之際上緊修辦以資捍衛所借銀兩卽自道光十四年爲始在於糧田項下分作三年按畝攤徵還款庫項不致久懸民生藉資樂業感沐

皇仁實靡有旣至此項圩埂各業戶捐資不足借項奏辦民借民還自行經理不涉官吏之手民間不知則例應請亦照沙洲圩之案免其造冊報銷統俟工竣委員驗收取造攤徵細冊各部備覈合竝陳明伏乞

皇上聖鑒訓示謹

奏

道光十三年正月二十二日具

奏二月二十二日奉到

硃批另有旨欽此同日奉到道光十三年二月初八  
日內閣奉

上諭陶澍等奏圩堤被水衝決民力捐修不足請借  
項奏辦分年攤還一摺江寧府屬六合縣境雙城  
果盒二圩堤埂爲附近各圩保障上年夏間江湖  
漲發衝決二十餘段自應及時興築俾資捍衛據  
該督等查明此項工程本應民間集貲修辦惟災

歉之後生計維艱所有共估需銀五千餘兩除業  
民已捐銀二千餘兩仍不敷銀三千三百兩民力  
實難捐足援案懇請借項奏辦自係實在情形著  
照所請准其在於司庫銀項照數借撥乘此春初  
水涸飭令趕緊修辦以衛田廬所借銀兩著自道  
光十四年爲始在於糧田項下分作三年按畝攤  
徵還款此項圩埂借項奏辦民借民還不涉官吏  
之手著免其造冊報銷工竣委員驗收仍著取造  
攤徵細冊咨部查覈該部知道欽此

覆奏跟緝挖堤首犯情形摺片

再道光十三年正月初三日承准軍機大臣字

寄奉

上諭據朱士彥等奏盜決河堤首犯陳端尙未弋獲  
訊據陳堂等供稱陳端在山東道上曾告知伊等  
如袁雙觀家不能久住有江西糧船南前幫旗丁  
俞晚生及艾隆仔船上管船人本松並山東河南  
交界之劉家口子地方開設合興建功建德長號  
四家豆行人趙姓花姓鄭姓俱相素識並山東臺  
兒莊一帶煤窑均可躲避等語著各該督撫等密

飭各該地方官選派妥役勒限上緊購線訪拏陳  
端務獲究辦如得有端倪卽跟踪追緝毋任遠颺  
漏網竝嚴飭各該州縣不得藉此滋擾倘不實力  
查拏仍令潛踪藏匿一經隣省躡緝在該管地方  
拏獲必將該管督撫及該州縣等懲處不貸毋得  
視爲海捕具文等因欽此遵查陳端一犯因黃水  
盛漲希圖放水淤地輒敢糾聚多人黃夜空放  
情罪重大必須嚴拏重懲而承緝各官查拏不  
力亦斷不肯稍事姑容前因要犯陳端陳堂陳  
光南三名未獲奉到

上諭前署淮安府知府塔克興阿河標右營遊擊三  
音特古斯革職勒限一箇月幫緝無獲治罪現任  
淮安府知府周燾現署桃源縣知縣徐麟趾亦勒  
限一箇月加緊緝捕無獲叅懲等因欽此當卽恭  
錄嚴劄依限獲辦去後旋據報獲要犯陳堂卽  
陳鏞陳光南二名並獲陳欽陳鳳台等均經附  
片具

奏聲明首犯陳端尙未弋獲復奉

諭旨著該督撫等嚴飭各員弁勒限偵緝務獲毋再  
遲延干咎等因欽此又經勒限飭拏卽續獲田寶



敬于振綱張蘭范洪起王聿貴五名連陳堂等  
先後共獲九名經

欽差工部尙書朱士彥等會同臣陶澍審明分別問  
擬絞候流徒具

奏其首犯陳端未獲究出逃匪各處分別勒拏咨  
緝各在案臣等伏查此案要犯陳端陳堂陳光  
南三名前蒙

聖恩兩次勒限飭拏該幫緝接緝各官專派丁役購  
線懸賞會同各地方及臣等所派文武員弁分  
路密捕跟踪追緝得將要犯陳堂陳光南二名

硃批

此皆畏葸後備不可信以爲實

定城外之信已購線趕往並飛咨直隸督臣飭

拏其餘山東河南安徽江西等處無不嚴密窮

搜

臣

等復疊次飭委標弁並河標副將秦攀萼

宿州遊擊楊廷璧及向能緝捕之劉大烈范鳳

陸軍部奏請將沈炳等多員四路訪拏不獲不止斷不任視  
爲海捕具文致要犯稽誅亦斷不任藉端紛擾  
致滋拖累至山東省高畱陳端之袁雙觀吳振  
川現經解浦委審嚴追踪跡俟確切訊明究辦  
外所有接奉

諭旨跟緝情形謹先合詞附片覆  
奏

道光十三年正月二十二日附

奏二月二十二日奉到

硃批務要刻卽拏獲以正刑誅若竟不可得自汝以

下朕決不寬貸也欽此

淮北辛卯綱鹽課奏銷摺子

奏爲淮北辛卯引鹽截數商運不足票運有餘撥  
補造報奏銷仰祈

聖鑒事竊照淮北辛卯綱應徵正雜鹽課錢糧前因  
試行票鹽經臣於淮南奏銷展限案內

奏請將淮北額引劃出俟年底另行奏辦在案飭  
據陞署鹽運使俞德淵於道光十二年十二月  
截數造報奏銷查辛卯綱應徵入奏及不入奏  
正雜各課共銀三十一萬一千一百二十五兩  
七錢二分七釐內票販請運引內徵收銀十五

萬三千三百六十九兩六錢六分二釐官運引  
內徵收銀六萬一千六十六兩四錢八釐商運  
引內徵收銀三萬七千八百十六兩五錢五分  
八釐借馬未完銀五萬八千八百七十三兩九  
分九釐以上其符辛卯正綱之額又辛卯應帶  
徵節年各課銀九萬六千一百四十一兩三錢  
七分八釐內於票販請運引內撥收銀三萬一  
千五百十三兩三錢二分官運引內徵收銀一  
萬八千八百八十六兩四錢七分商運引內徵  
收銀一萬六千六百六十三兩一分五釐未完

銀二萬九千七十八兩五錢七分三釐以上共  
符辛卯帶完之數此淮北分別官商民販運引  
徵課之實數也除分別恭繕疏冊仍循向例具  
題併勒限催追商欠底馬另行補報外尙有截數  
後續請票鹽三萬八千餘引應歸入壬辰綱造  
報至票運錢糧前經

奏明按照商運科則減納三成之一每引徵課銀  
七錢二分今辛卯正綱票販運過鹽十五萬九  
千三百五十引照議祇應完銀十一萬四千七  
百三十二兩按照舊則計減缺銀三萬八千六

百三十七兩六錢六分二釐茲於票鹽經費內  
節省補足歸還舊則是票運引鹽竝無減缺之  
課其撥運分帶殘鹽四萬三千七百六十八引  
係照每引七錢二分撥收計減缺銀一萬八百  
八十餘兩俟另行籌補歸還伏查淮北商疲運  
滯引積課懸歷辦奏銷專藉淮南牽算造報今  
因試行票鹽分別官商民販各運各銷照額商  
運各岸應銷二十二萬六千四百四十七引今  
商運甫及其半加入官運仍多缺額其已改票  
運各岸應銷正額及加帶各引共祇十四萬八



千七百十一引現已全銷仍有溢運鹽五萬四千四百餘引卽藉以撥補商運未足之數無須淮南牽算而淮北一綱正額全銷竝加帶已丑庚寅戊子各銀引俱已完竣實爲從來未有之事淮北頓形起色此皆仰賴

聖主整飭多方

先幾指示俾得變通盡利藉挽頽綱

微臣

曷勝感幸

除將湖運畱商各岸督同運司暨委員鄒錫淳確切籌議一併改行票鹽另摺陳明外所有淮北奏銷實數及辦理情形理合縷晰具

奏伏乞

皇上聖鑒謹

奏

道光十三年二月初十日具

奏三月初九日奉到

硃批戶部知道欽此

請鼓勵辦理票鹽出力各員摺片

再淮北票鹽係屬勦舉章程一切無可依倣當  
發令之初物議橫生或言票鹽有損於商無益  
於官或言引梟入場必爲民害或言壩損失業  
必滋事端或言鹽至中途必被搶劫或言充斥  
旁岸必致虧課種種搖惑無非阻撓先經臣遴  
委王鳳生勘定規模繼委鄒錫淳帶同委員謝  
元淮前往逐細履視經營籌畫分晰條款與運  
司妥議詳辦臣於四月內復親往海州指示定  
局旋委伍家榕署海州事與州判龔照琪力肩

奔走不惑浮言謝元淮復同鹽務委員孫玉樹  
孫紹恒等稽查卡局相機經理每處過鹽至數  
萬十數萬之多從九品孫豐外委范雲彪巡緝  
奮勇會同地方文武拏獲販私拒捕之梟目劉  
懷寶李祥楊志祥懷廷明左開倫周得付孫二  
聞得等併刀鎗各械孫豐復迭次拏獲私鹽十  
餘萬鹽犯十數名場務更加整肅販運益見流  
通其餘各委員亦俱協力齊心分路照料俾海  
州數十年極敝之場頓有起色納課踴躍民情  
歡欣而皖豫數十州縣亦無虞淡食實屬竭力

認真辦妥速臣不敢沒其微勞除王鳳生鄒  
錫淳不敢仰邀議敘范雲彪由臣記名拔補外  
合無仰懇

天恩俯准將前署海州陞用同知直隸州知州坐補  
江都縣知縣伍家榕免其坐補卽行陞用金壇  
縣丞謝元淮海州州判龔照琪以應陞之缺儘  
先陞用候補鹽經歷孫玉樹候補從九品孫豐  
候補鹽知事孫紹恒各以本班儘先補用俾昭  
鼓勵仍酌畱於海州與改補知縣王澄候補知  
事陳慶恒等隨同鄒錫淳辦理票鹽未盡事宜

毋許鬆勁務臻妥協仰副

聖主整飭鹽綱至意謹附片陳明請

旨施行謹

奏

道光十三年二月初十日片

奏三月初九日奉到

硃批另有旨欽此同日奉到二月二十五日內閣奉  
上諭陶澍奏辦理淮北票鹽各員認真妥速請予鼓  
勵等語前署海州陞用同知直隸州知州坐補江  
都縣知縣伍家榕著免其坐補卽行陞用金壇縣

縣丞謝元淮海州州判龔照琪俱著以應陞之缺  
儘先陞用候補鹽經歷孫玉樹候補從九品孫豐  
候補鹽知事孫紹恒俱各以本班儘先補用以示  
鼓勵該部知道欽此

推廣淮北票鹽摺子

奏爲淮北票鹽試行有效請將湖運畱商十一州縣推廣辦理復還舊則徵收竝酌訂章程以裕課便民仰祈

聖鑒事竊照淮北商運疲敝多年課食兩懸幾成虛設備極調劑之方總無挽回之益前經臣

奏請改行票鹽於安徽河南之滯岸二十一州縣竝江蘇之食岸八州縣及例不銷引之海州安東二州縣先行招販試運給予印票運行照舊額科則酌減三分之一徵銀七錢二分又鹽價



銀六錢四分辦公各項經費銀五錢二分議定  
設局設卡章程並聲明如果有效再行推廣辦  
理欽奉

諭旨允行在案其暢銷之江運八州縣湖運十一州  
縣仍留商運原以改滯留暢俾累去利存即可  
漸培商力茲查票鹽自上年七月開局起至冬  
底截數已請運過二十萬三千一百餘引較原  
額溢運過半而所留商運暢岸開綱兩年之久  
商人僅請運過十萬五千餘引加以官運六萬  
六千餘引亦尙未足商岸應運之額現在截數

奏銷卽係以票販溢運之數撥補造報而商運引內仍有借欠底馬錢糧未完是商人之積疲莫振雖專畱暢岸尙不能勉力轉輸斷難望其轉機查票鹽自試行以來海屬積滯之鹽販運一空窮苦場民藉資甦活卽游手閒民亦得以轉移執事是以上年海州災務極重而地方尙稱安帖實得票鹽之濟其皖豫各省尙多缺鹽之患官文上下絡繹督催商運仍然不前甚至閉門逃避百姓淡食不得已而買食私鹽地方官亦不得已而佯爲不知督銷有同具文且鹽

價騰貴每觔需錢六七十文自票鹽到境鹽價頓減取攜甚便民情安之從前私梟充斥每因地方乏鹽得以乘虛而入而晒掃各場民亦因商不收買鹽無出路不得已而偷漏於梟其實場民一與梟接卽受其脅制得不償失私梟雖多亡命之徒內中亦有身家挺而走險原非所性茲旣轉運流通彼此無須偷漏卽可化梟爲良迥異從前之私充課紂現在票鹽之課溢於原額淮北通綱之引俱已請運全竣是票鹽之利實足以下便民生上裕

國課業已試行有效自應欽遵前奉

諭旨卽行推廣辦理飭據陞署鹽運使俞德淵會同  
總辦委員鄒錫淳覈議具詳前來除例由江運  
之安徽省桐城舒城無爲合肥廬江巢縣滁州  
來安八州縣及例由高郵湖運之天長一縣俱  
與淮南引地錯雜未便招販行票致啟浸灌其  
原額八萬一千六百二十引照舊由商認辦並  
隨時察看情形濟以官運保固淮南籐籬外所  
有湖運暢岸安徽省之壽州定遠六安霍山霍  
邱河南省之信陽羅山光州光山固始商城十

一州縣額運九萬六千三百九十三引竝食鹽  
融綱一萬三千三百五十五引請一律推廣照  
淮北滯岸章程招商販運改行票鹽查上年所  
議課則較原額酌減係因試行伊始輕本以利  
招徠旋因經費有餘撥還原額今既試行有準  
更可復還舊制應照淮北原定科則每引徵正  
銀一兩五分一釐其另徵經費五錢二分爲傾  
鎔解費設局設卡巡緝委員薪水書役紙飯及  
公費等項之用上年既有節省撥補正課應將  
經費酌減一錢二分每引徵銀四錢前定鹽價

六錢四分亦酌減四分統計每引鹽四百觔爲一票共徵銀二兩五分一釐此外不許絲毫增加俾票販易於運行課項無虞短絀如有多運卽以融代江運之不足及未請殘綱各積引以彌全局惟思票販章程原議指定請運州縣填註票內越境卽以私論係屬保固商岸之意茲商運旣不敷額而票販所行各岸有請至數萬引者亦有僅請百十引者鹽多旣慮其滯銷鹽少又慮其乏食難免窒碍自應量爲變通如票鹽業已出卡經委員加印驗戳運行之後因所

指州縣鹽壅銷滯准其就所在地方呈明轉運他岸通融售賣但不得越出票鹽四十二州縣之界外倘或南侵淮南與江運各岸北越路東長蘆各引地仍照梟私例治罪至場鹽自海州內河溯流入黃總須俟漕竣雙金閘放水方能運行若雙金閘未開鹽河卽無水可通查海屬之鶯游門灌河口均係濱海民船往來之所鹽本海產一經納課請票已有稽查但須於黃河之八灘等處擇要設卡盤驗加截遇鹽河無水時卽由此路海灘轉尖入黃行走俾內外河均

有水可運各岸可無缺鹽之患矣其餘未盡事宜容督同運司暨委員隨時查辦竝分飭地方文武嚴查地棍匪徒毋許阻撓禁止丁書兵役毋許騷擾使票販益就招徠淮北可期大有起色所有推廣票鹽試行湖運各暢岸併復還課額酌訂章程各緣由謹繕摺具

奏伏乞

皇上聖鑒訓示謹

奏

道光十三年二月十二日具



奏三月初九日奉到

硃批另有旨欽此同日奉到二月二十五日內閣奉  
上諭陶澍奏淮北票鹽試行有效請推廣辦理並復  
還舊則酌訂章程一摺着戶部速議具奏欽此

道光十三年三月二十三日准戶部咨開內載  
戶部謹

奏爲遵

旨速議具奏事內閣抄出兩江總督陶澍奏淮北票  
鹽試行有效請推廣辦理並酌訂章程一摺道  
光十三年二月二十五日奉

上諭陶澍奏淮北票鹽試行有效請推廣辦理並復  
還舊則酌訂章程一摺著戶部速議具奏欽此欽

遵於本月二十六日抄出到部據該督奏稱  
云等伏查淮北鹽務向稱疲敝上年五月經兩

江總督臣陶澍奏准將該處湖運綱鹽滯岸及食鹽各岸試行票鹽酌議設局收稅章程每鹽四百斤爲一引合鹽價銀六錢四分每引按商運科則酌減三分之一計銀七錢二分又傾鎔解費設局設卡緝私經費及委員薪水書役紙飯等項計銀五錢二分通計一引徵銀一兩八錢八分於板浦中正臨興三場適中之地設局招徠聽民納稅請票指地販運其安徽省江運各口岸暨安徽河南兩省湖運暢岸仍令舊商認辦統俟察看半年後約計盈絀以定銷數等

因在案茲據該督奏稱票鹽自上年七月開局起至冬底截數請運過二十萬三千一百餘引較原額溢運過半而所留商運暢岸商人僅請運過十萬五千餘引加以官運六萬餘引尙未足商岸應運之額仍有借欠底馬錢糧未完是商人積疲莫振雖專留暢岸尙不能勉力轉輸現在票鹽之課溢於原額淮北通網之引俱已請運完竣業經試行有效應請推廣辦理等語查淮北留商湖運暢岸自辛卯開網迄今已屆兩年該商等僅運過十餘萬引較之滯岸試行

票鹽半年以來已運過二十餘萬引多寡大相懸殊自未便任其引滯課懸應如該督所請將安徽省之壽州定遠六安霍山霍邱河南省之信陽羅山光州光山固始商城等十二州縣額運正引併食鹽融綱各引一律推廣招販納稅改行票鹽仍令將安徽省向由江運之桐城等八州縣及由高郵湖運之天長一縣留商認辦以固淮南藩籬至上年酌定科則每引徵正銀七錢二分原係減輕成本以利招徠今既試行有效自應復還舊則仍照商運原額徵正銀六

兩五分一釐所有上年酌減三分之一短徵正課銀兩卽照該督所議於經費節省項下照數撥還原額以重課項其經費及鹽價兩項旣據該督核算均可節省亦應如所奏於原定經費五錢二分內酌減銀一錢二分鹽價銀六錢四分內酌減銀四分統計每引連正課共徵銀二兩五分一釐一體按引徵收如有額外多運之引卽以融代江運之不足並彌補未請殘綱積引統於奏銷時分晰劃清造報毋任含混再票鹽指地販運原以保固商岸今商運旣不足額

票販各口岸自應量予變通如所指之地鹽壅  
銷滯准其於出卡之後就所在地方呈明轉運  
他岸售賣惟該督原定章程係於民販納稅請  
票時卽按指銷州縣於票內註明道里遠近立  
限到岸繳票行銷今既准其轉運他岸則道里  
程限不同其應作何查驗防範以杜侵佔偷漏  
之處應令該督酌核妥辦倘有越界行銷者卽  
以私梟例治罪至海州引鹽出場向俟六七月  
間雙金閘放放趁水趕行冬春閉閘鹽河卽行  
停運今該督請由鶯游門灌河口轉尖入黃行

走固係爲票販趙運起見但該處俱係濱海地  
方向來不通販運是否可以聽票販鹽船出入  
臣部難以懸議應令該督妥爲籌畫辦理至現  
在變通票鹽章程必須毫無窒礙方可行之久  
遠應仍令該督隨時體察情形不使稍滋流弊  
庶於嵯務實有裨益所有臣等遵

旨速議緣由理合恭摺具

奏是否有當伏乞

皇上聖鑒謹

奏



道光十三年二月三十日奏本日奉

旨依議欽此

請飭湖廣總督查禁岸費摺片

再淮南鹽綱以漢口一岸行銷湖南湖北爲大宗該岸規費最爲浮濫前經

欽差尙書王鼎等會議定以每引提銀四錢毋許多

用竝經

臣

委員前往會同該鹽道刪定各衙門

數目詎道光十一年該岸用數又有浮濫經

臣

奏明提揚審辦現已提到經手各商剗發運司研

審所呈數目甚多深堪詫異是否浮用在官抑

或商有混冒必須提同質對明確加以懲儆因

思頻年商困已極轉運維艱現在甫有轉機自

應資之體卹必得用度裁省始能成本稍輕源  
源接濟若漢岸浮用太甚卽恐商運踳踳又形  
觀望將來漢岸萬一缺鹽誰執其咎現查牽涉  
各衙門俱在湖北若紛紛提質亦屬非體相應  
請

旨交湖廣總督就近查傳質訊照例辦理俾儆將來  
臣已一面飭司將經手各商暨簿冊解往備質  
合併附片陳明謹

奏

道光十三年二月十二日具

奏三月初九日奉到

硃批另有旨欽此同日奉到道光十三年二月二十

六日內閣奉

上諭陶澍奏漢口鹽岸規費浮濫請將經手各商解  
交湖北質訊等語准鹽各岸規費業經裁減漢岸  
亦經刪定茲據陶澍查明道光十一年該岸用數  
又有浮濫提到經手各商研審所呈數目甚多是  
否浮用在官抑或商有冒混必須提同質對明確  
所有牽涉各衙門均在湖北著將經手各商暨簿  
冊一併解往湖北交訥爾經額就近查傳質訊明

確照例定擬具奏以肅鹺政欽此

運使陞署任滿請給實授摺子

奏爲陞署兩淮鹽運使兩年任滿稱職循例恭懇  
恩施俯准實授以專責成而重鹺務仰祈

聖鑒事竊照兩淮鹽務事體繁重運使一缺尤難得  
人前因查辦鹽務欽奉

諭旨令臣酌保一員當經臣查有江寧府知府俞德  
淵堪以勝任惟歷俸未滿年限或補或署恭候  
聖裁道光十一年正月二十七日奉

旨兩淮鹽運使著俞德淵陞署欽此該署司卽於是  
年二月十六日到任扣至本年二月內兩年期

滿查該署司品著端方心存誠正自抵任汴事  
正值鹽務疲敝已極於無可措施之中設法招  
徠竭力籌運兩載以來綱食引鹽運銷漸暢前  
因淮北商運不前另籌詳請試行票鹽數月之  
內已運過二十萬三千一百餘引於年額應銷  
之數全完加帶之數亦竣且於年綱加帶之外  
尙有溢運之鹽數萬引是淮北鹺務業已著有  
成效淮南亦頗形起色督理得宜實屬稱職之  
員伏查例載在外

命往試用道府以下各官銜大缺小銜缺相當者試

用一年銜小缺大試用二年果能稱職該督撫將政績敘入本內保題實授等語茲署運使俞德淵由知府陞任係屬銜小缺大其署事實授與道員試用無異自應以兩年爲限惟應否具題例內竝無明文謹援例專摺具

奏合無仰懇

聖慈將陞署兩淮鹽運使俞德淵

加恩俯准實授以專責成如蒙

俞允在該員感激

鴻施固應倍切捐糜而臣亦藉收指臂之助於嵯務



實有裨益爲此恭摺具

奏伏乞

皇上聖鑒訓示謹

奏

道光十三年二月十二日具

奏三月初九日奉到

硃批另有旨欽此同日奉到二月二十六日內閣奉  
上諭陶澍奏陞署運使兩年任滿懇恩俯准實授一  
摺陞署兩淮鹽運使俞德淵自任事以來設法招  
徠竭力籌運辦理尙屬認真俞德淵著加恩准其

實授欽此

籌修豐縣城橋暨碭山挑河摺子

蘇撫河督會稿

奏爲徐州府屬之豐縣護城河堤橋座殘缺並碭山縣之減水河淤墊請分別動項借款挑辦以衛城垣而資宣洩仰祈

聖鑒事據徐州府豐縣稟該縣地處黃河北岸界連沛縣昭陽湖勢本低窪城外舊有護城堤一道攔禦外來瀝水堤內有護城河一道藉以疏消城內積水前於嘉慶三年因元年黃水漫溢之後河淤堤缺給項挑築迄今三十餘年歷被雨水冲刷堤河本有殘缺淤墊上年夏秋間暴雨

狂風兼之上游瀝水奔騰勢甚洶湧以致漫堤入城堤工之殘缺河身之淤墊較前更多且有淤平之處城內地勢最低易於浸灌亟應趕緊挑築以防水患又四城門外濠上各有券橋一座因建修年久均經坍倒損壞隨飭徐州府委員署沛縣知縣朱榮桂會同該縣王元本勘明前項堤工被水沖刷殘缺河身全行淤墊橋座俱已坍塌亟應分別挑辦查勘護城濠河一道計長一千三百一十三丈原挑口寬八丈底寬二丈五尺深一丈五尺今將淤墊處所照依原

估丈尺一律挑挖深通估土五萬八千四百六十二方五分五釐乾淤各半每方價銀一錢八釐共計銀六千三百一十三兩九錢五分五釐又護城堤一道計長一千四百三十九丈原築頂寬三丈底寬八丈高一丈本屬卑薄恐不足以抵禦黃水今將塌卸殘缺處所補築齊全卽於舊堤裏面幫寬一丈再於新舊頂上加高二尺做成收頂寬三丈底寬九丈高一丈二尺共估土十萬三千六百八方內除舊堤土二萬二千六百一十方實計新土八萬九百九十八方

內挑濠土五萬八千四百六十二方五分五釐  
用以築堤毋庸另估方價每方照例估計礮水  
銀四分五釐共計銀二千六百三十兩八錢一  
分四釐實需新土二萬二千五百三十五方四  
分五釐每方價銀一錢二分五釐共計銀二千  
八百一十六兩九錢三分一釐又估修券橋四  
座實需工料銀一千五百三十三兩一錢三分  
二釐通共挑濠築堤券橋共需銀一萬三千二  
百九十四兩八錢三分二釐由徐州府覆覈俱  
係照例撙節估計竝無浮多詳請籌款給辦乘

此青黃不接之際集夫興工俾災區貧民藉資  
傭趁餬口卽可以工代賑又據碭山縣稟該縣  
境內有減水河一道與上游河南省之永城夏  
邑虞城三縣犬牙相錯爲江豫兩省洩水要道  
近年以來大雨沖墊沙土積壓逐段淤塞水流  
不暢以致申公堤口日漸沖缺永碭兩邑民人  
紛紛訐訟現將缺口循照舊章令民自行修築  
惟河身淤墊之處必應一律挑浚深通以免壅  
塞隨飭徐州府親往確查竝令碭山縣會同永  
城縣詣勘該處地形本屬高仰前自道光四年

興挑之後數年以來水沖沙壓逐段間阻必得  
大加挑浚庶水勢趨下不致壅阻沖缺除永城  
境內應挑河道另由豫省查辦外所有礪山境  
內應挑河道從永城上界第一段起至永城下  
界止計工長二千二百丈節節淤墊若不趕緊  
興挑必致淤成平陸逐細丈量共估淤土四萬  
八千三百二十九方每方銀一錢三分六釐共  
銀六千五百七十二兩七錢四分四釐請循照  
上屆借

帑興挑之案在於司庫籌撥乘時挑辦分年攤還



等情由江寧布政使趙盛奎查覈明確詳請具  
奏前來臣等伏查豐縣護城河堤橋座碭山縣減  
水河等工爲保衛城垣宣洩田疇要工旣據徐  
州府分別親往並委員會同該縣逐一勘明實  
在被水沖缺殘損淤墊亟應挑築以資保衛宣  
洩洵屬刻不可緩之工且際此青黃不接可使  
附近災民藉資傭趁以工代賑實於水利民生  
兩有裨益所有該二縣估需工費銀兩均請於  
司庫正項蘆課銀內分別動給挑辦至豐縣護  
城河堤橋座請動銀兩從前河淤堤缺給項挑

築此次應仍請作正開銷竝飭取造冊結照例  
詳辦其碭山縣減水河道上屆挑浚估銀一萬  
八千餘兩分六年攤徵還款此次估銀六千餘  
兩合無仰懇

皇上天恩俯准從道光十四年起分作三年攤徵還  
款此項減水河道借項挑浚係民借民還工竣  
時應請免其造冊報銷仍飭取造攤徵細冊詳  
請咨部查覈除將永城縣境內河道應行一律  
挑修移咨河南撫臣飭勘辦理外謹會同江南  
河道總督臣張井合詞恭摺具

奏伏乞

皇上聖鑒訓示謹

奏

道光十三年二月二十九日具

奏三月二十六日奉到

硃批另有旨欽此同日奉到三月十三日內閣奉

上諭陶澍等奏豐縣護城河堤橋座殘缺並碭山縣  
減水河淤墊請分別動項借款挑辦一摺江蘇徐  
州府屬豐縣護城河堤橋座碭山縣減水河等工  
爲保衛城垣宣洩田疇要工據該督等查明被水

沖缺殘損淤墊亟應挑築以資保衛宣洩自係刻  
不可緩之工所有該二縣估需工費銀共一萬九  
千八百六十七兩零著照所請准其在於司庫正  
項蘆課銀內分別動給挑辦至豐縣護城河堤橋  
座向係給項挑築此次著准其作正開銷仍飭取  
造冊結照例詳辦其礪山縣減水河道所估銀兩  
著准其從道光十四年起分作三年攤徵還款此  
項減水河道借項挑浚係民借民還著免其造冊  
報銷仍飭取造攤徵細冊報部查覈該部知道欽  
此

丁憂守備仍請陞署摺片

再京口右營水師守備鄭長清係於千總任內  
首先挈獲儀徵老河涇地方梟匪蔣四長子卽  
蔣來山等首夥各犯案內出力經臣奏奉

諭旨著以守備儘先陞用等因道光十二年三月內  
經兵部擬補廟灣營守備臣因京口右營守備  
係沿江水汛私梟出沒之區守備鄭長清熟悉  
情形巡緝得力請與京口右營守備朱錡對調  
經兵部題准奉

旨鄭長清等依議調補餘依議欽此行令給咨赴部

等因時因緝私緊要委令先赴調任正在給咨  
問因三江營守備員缺亦係江面緝私要地復  
又委令暫署致未給咨茲據京口水師副將田  
松林詳報該守備於道光十二年十二月二十  
三日在三江營署任聞訃丁父憂等情前來查  
陞補人員未經引

見適遇親喪例應扣除另補惟道光九年江西南昌  
城守營守備李步月題陞永新營都司又道光  
十年狼中營守備李湘請陞狼左營都司俱於  
未經引

見之先適遇親喪

奏准陞署有案今京口右營守備鄭長清本係緝  
梟出力以守備儘先陞用之員經兵部擬補廟  
灣營守備復經臣題請調補京口右營守備已  
兩次奉

旨准陞准調在先其未能卽時送部實因巡緝得力  
委署要缺並非無故逗遛現遇親喪覈與從前  
李步月李湘奏請陞署之案相符相應援案具  
奏仰懇

天恩俯准將京口右營守備員缺仍以鄭長清陞署

俟該員服闋後給咨送部引

見再請實授以裨營伍而重地方

臣謹會同江寧京

口將軍

臣

巴綱阿署理江蘇提督印務蘇松鎮

總兵

臣

關天培合詞附片具

奏伏乞

聖鑒訓示謹

奏

道光十三年二月二十九日附片具

奏三月二十六日奉到

硃批另有旨欽此同日奉到三月十三日內閣奉



上諭陶澍奏調補京口右營水師守備鄭長清未經  
引見據報丁憂請仍以該員陞署等語鄭長清本  
係緝梟出力之員著准其陞署京口右營水師守  
備俟該員服闋後送部引見再請實授該部知道  
欽此

審明出征官兵索擾毆斃人命分別定擬摺子  
奏爲遵

旨審明分別定擬仰祈

聖鑒事竊照上年河南出征官兵行至宿州需索銀  
錢毆傷該州家人胡林身死一案奉

上諭陶澍奏出征備弁兵丁在途索擾毆斃人命一  
摺出征兵丁在途行走該管官理應嚴加約束安  
靜趨程此次河南第八起官兵行至安徽宿州睢  
陽驛延不起身河北左營守備馬鳳把總拜鵬藉  
稱回教需索銀錢復以不遂其數任聽兵丁將該

署州家人胡林等差役李萬等肆毆被傷胡林旋卽身死又不將傷人兵丁交出殊屬膽玩此風斷不可長必應嚴辦示懲著河北鎮總兵謝金章將馬鳳等所管第八起兵丁另派將備帶領守備馬鳳把總拜鵬均著革職無論行抵何處卽行扣留竝勒令交出行凶兵丁一併交該地方官解赴江寧交陶澍嚴行審辦按律治罪竝飭沿途州縣於後起官兵過境妥爲彈壓毋許滋擾如再有勒索情弊卽行奏叅嚴辦决不寬貸欽此嗣由蘇州將革備馬鳳兵丁楊順餘丁金得功截回在馬鳳

行李內搜出銀兩竝河南撫臣楊國楨臨行誠  
諭一本又經河北鎮右營守備尹殿英將拜鵬  
交出實係外委竝非把總暨兵丁丁學禮買玉  
印餘丁崔萬成由安徽鳳陽府解到據拜鵬供  
出喝毆之兵丁拜金科在場之陳斗金馬進才  
張世雙曹世杰祁得功又滋事之魏照明張世  
江竝聽從馬鳳霽索之景名揚馬萬鵬呂旺竝  
據河北鎮總兵謝金章來文將守備尹殿英叅  
奏摘去頂戴扣留解質旋據尹殿英稟有餘丁賀  
掌在宿州爭毆後卽回河南原籍情節可疑等

語臣覆咨會河南撫臣飭拏解江一面委令江

寧藩司趙盛奎確審實情按擬詳辦又經附片

陳明在案旋准河南撫臣將賀掌及賀掌供出

之許長清一併拏獲解江臣竝札調前署宿州

知州李承恩親帶家丁楊忠差役徐乾李萬等

同開張歇宿之王瑞玉來省一同質訊發交江

寧藩司督率江寧府等歸案審訊茲據藩司趙

盛奎審擬招解前來臣親督該司提集犯証逐

加確鞫緣拜金科丁學禮買玉印陳斗金楊順

馬進才許長清係河北鎮右營兵丁拜鵬係河

北鎮石營外委崔萬成賀掌係餘丁武生景名  
揚及馬萬鵬呂旺係河北鎮左營兵丁均籍隸  
河南河內縣馬鳳係河北鎮左營守備籍隸山  
西大同縣馬鳳拜金科丁學禮買玉印陳斗金  
拜鵬馬萬鵬呂旺均係回民道光十二年十月  
福建臺灣匪徒滋事奉調河南官兵一千名進  
剿經河南撫臣楊國楨派令分起行走預慮沿  
途騷擾於臨行時傳齊官兵當堂諄切面諭猶  
恐不能周知又經刊刻條款散給多本明白誠  
諭俾令隨時閱看觸目警心其條款內有毋許

騷擾一款云軍中紀律甚嚴如有騷擾卽以軍法從事若未曾立功先犯軍法非至愚而何爾等所過州縣毋得額外索取等語十一月十六日馬鳳帶領左營兵丁一百二十四名右營守備尹殿英帶領右營兵丁一百二十名由懷慶府同日先後起程馬鳳藉稱回教飲食不便令景名揚作爲前趾需索折席及程儀銀兩所過之處因恐滋事遲誤各付給銀數兩不等竝給景名揚及回教馬兵馬萬鵬呂旺每人錢各數百文是月二十八日馬鳳尹殿英同抵安徽宿

州東門外睢陽驛分住寓所相距三箭許拜鵬  
與拜金科丁學禮買玉印陳斗金崔萬成楊順  
馬進才許長清賀掌同寓馬鳳對門店內拜鵬  
因探知馬鳳沿途得受銀錢亦欲需索隨與馬  
鳳拜金科商允令兵丁執持拜鵬名帖赴州聲  
稱馬鳳與伊係屬回教每人須送折席錢十千  
文程儀銀二十兩拜金科與馬萬鵬呂旺及右  
營守兵丁學禮買玉印陳斗金均係回教景名  
揚係馬鳳前站亦須折給飯食錢文該署州李  
承恩不允馬鳳等卽肆詈鬧該署州恐致滋事



隨付給馬鳳銀六兩錢二千文拜鵬銀四兩錢  
一千四百文拜金科景名揚馬萬鵬呂旺每人  
錢六百文丁學禮買玉印陳斗金每人錢三百  
文詎馬鳳等未滿所欲延挨不行至二十九日  
已刻右營兵丁尙未起行紛紛入城竝有左營  
兵丁張世江因天氣寒冷將該州備用桌椅劈  
碎燒燬該署州當卽會同護宿州營遊擊李衡  
年往拜馬鳳催令起行馬鳳不出會晤該署州  
復往尹殿英處拜晤尹殿英以伊早欲起程因  
馬鳳領隊在前不能越次先行該備令人往向

馬鳳催促馬鳳仍未起行該署州因知拜鵬與馬鳳同教交好遣令家丁胡林楊忠執帖往託拜鵬催促馬鵬起行適拜鵬先赴尹殿英寓內拜金科令丁學禮執持拜鵬名帖走出回答胡林疑係有意躲避接過拜鵬名帖藏於袖內聲言如再不行回明本官據實通稟丁學禮入向拜金科告知拜金科恐其存畱名帖作爲需索憑據手提馬鞭與丁學禮同出寓外向胡林討帖胡林不肯給還仍以通稟等語向說拜金科生氣首先用鞭杆打傷胡林偏右維時在場兵

丁甚衆拜金科喝令衆兵毆打丁學禮買玉印  
陳斗金楊順崔萬成馬進才許長清賀掌俱各  
聽從或取車上木棍或係徒手將胡林楊忠一  
併扭進寓內丁學禮許長清抓住胡林衣袖奪  
回名帖丁學禮等將胡林楊忠推跌倒地一齊  
毆踢致踢傷胡林胸膛心坎挫傷額顱抓傷咽  
喉竝毆傷楊忠左太陽左額角左右肩甲俱昏  
暈在地當因人衆亂毆不知何人毆傷何處張  
世雙曹世杰祁得功亦各在場觀看並未幫毆  
該署州李承恩得信帶同差役徐乾李萬陳沅

前往彈壓及至拜鵬寓外衆兵內不知何人執持馬鞭混行毆打李萬看見恐傷本官上前救護致被毆傷右手腕該署州卽帶同李萬急忙轉回衆兵尾隨追毆又毆傷李萬鼻梁脊背陳沅脊背揪落陳沅髮辮一結竝將徐乾推跌在車轅鐵包皮上劃傷左手指該署州卽赴尹殿英寓所告知情由尹殿英當令馬兵魏照明往查一面親赴喝阻衆兵始各走散魏照明行至拜鵬寓內胡林業已因傷殞命魏照明見其已死口中戲稱你還敢與將爺打降麼隨卽轉回

向尹殿英告知馬鳳見已滋鬧領兵起行尹殿英比因人衆不能確查行凶之人又恐遲誤行程隨亦前進該署州李承恩當卽通稟經鳳陽府知府朱士達飭委鳳臺縣知縣沈宗誠驗訊通詳尹殿英在途查出共毆之丁學禮買玉印崔萬成及聽從需索之拜鵬一併送交定遠縣解審

臣

接據李承恩通稟

奏奉

諭旨將馬鳳拜鵬革職飭解江寧審辦竝經河北鎮總兵官謝金章

奏請將尹殿英頂戴摘去扣畱解質隨將各犯証  
先後截解來寧並調署宿州李承恩帶同丁役  
楊忠等赴省質訊供悉前情不諱再三嚴究各  
犯僉供實係一時爭鬧起釁拜金科首先動手  
並當場喝毆比因人衆倉猝亂毆委不知何人  
毆傷何人何處亦無謀故不法別情其毆傷差  
役李萬等之人係在拜鵬寓外人更衆多看視  
不清實不能供指姓名反覆推鞠矢口不移案  
無遁飾查例載共毆人亂毆不知先後輕重者  
無原謀則坐初門者爲首又出征處所兵丁藐

視該管官干犯號令違法亂行者將爲首之人  
正法爲從者枷號三個月杖一百又回民結夥  
三人以上執持器械毆人之案其共毆之犯但  
有一人執持器械者不分首從發雲貴兩廣極  
邊烟瘴充軍又律載監臨官吏挾勢求索財物  
計贓准不枉法諭出使人於所差去處求索者  
與監臨官吏罪同又不枉法贓各主通算折半  
科罪八十兩杖九十徒二年半各等語此案拜  
金科奉挑出征因與左營守備馬鳳俱係回民  
藉端需索錢文馬鳳未滿所欲延挨不行該州

遣丁胡林楊忠往催因胡林聲言如再不行卽  
回本官通稟該犯輒卽生氣首先用鞭杆將胡  
林毆傷竝當場喝毆致衆兵攢毆胡林立時斃  
命竝毆傷楊忠嗣經該州親往彈壓衆兵復敢  
向毆又將差役李萬徐乾陳沅毆傷皆由該犯  
一人倡首此次豫省兵丁瀕行時經河南撫臣  
楊國楨當堂面諭竝刊刻條款散給閱看乃該  
犯等甫出豫境卽藐視號令釀成一死四傷巨  
案若僅照尋常亂毆罪坐初門之例問擬無以  
整肅軍紀查出征兵丁毆斃人命向按軍法從



事宿州雖係經過地方並非出征處所惟調征  
兵丁膽敢在途需索騷擾糾衆逞兇毆斃平人  
自當從重懲辦拜金科應請照出征兵丁干犯  
號令違法亂行將爲首之人正法例按軍法擬  
斬立決照例先行刺字丁學禮買玉印陳斗金  
楊順崔萬成馬進才許長清賀掌廳從其毆致  
傷胡林斃命因人衆倉猝亂毆不記何人毆傷  
何人何處惟該犯等執持器械聽從其毆一死  
四傷僅擬枷杖未免輕縱丁學禮買玉印陳斗  
金楊順崔萬成馬進才許長清賀掌俱應於拜

金科斬罪上減一等杖一百流三千里丁學禮  
買玉印陳斗金三犯係屬回民既經持械共毆  
自應仍照回民本例問擬丁學禮買玉印陳斗  
金應照回民結夥三人以上執持器械毆人但  
有一人執持器械者不分首從發雲貴兩廣極  
邊烟瘴充軍例俱發雲貴兩廣極邊烟瘴充軍  
丁學禮買玉印許長清賀掌各供親老丁單係  
出征兵丁滋事釀命情節較重應毋庸查辦分  
別發配折責安置賀掌現已病故應毋庸議崔  
萬成據供其父崔大瀧於嘉慶十八年隨征滑

縣逆匪陣亡該犯有母秦氏現年五十歲並無  
弟兄子嗣查死罪人犯父祖陣亡例應查明聲  
敘恭候

欽定軍流人犯並無查辦明文崔萬成之父究係沒  
於王事據供並無兄弟子嗣應否准其查辦相  
應聲明聽候部覆張世傑曹世杰祁得功在場  
觀看並未幫毆惟並未勸阻亦屬藐玩均應照  
出征兵丁違法亂行爲從例枷號三個月杖一  
百魏照明張世江訊不在場惟魏照明經尹殿  
英令其往查見胡林已死出言戲謔張世江等

燒桌椅均屬不合魏照明應革去武生與張世江俱照不應重律杖八十再加枷號一個月不許再行食糧金得功係馬鳳隨丁另在他處看守軍裝車輛並未在場滋事應免置議已革河北鎮左營守備馬鳳奉派帶兵出征藉係回民沿途索擾竝敢任意逗遛以致兵丁釀成巨案查起出該革備紋銀一百八十九兩零元絲銀七錠洋錢九元內除原在河南領存軍裝銀三十一兩不計外其餘折實庫平紋銀一百六十二兩零俱係沿途需索照不枉法通算折半科

罪已應擬徒該革備係帶兵官敢於挾勢需索  
肇釁以致兵丁滋事毆斃人命殊屬膽大貪鄙  
應請從重發往新疆充當苦差已革河北右營  
外委拜鵬令人持帖赴州需索景名揚馬萬鵬  
呂枉聽從馬鳳沿途需索均屬不法未便僅止  
計贓科罪景名揚應革去武生與拜鵬馬萬鵬  
呂枉俱應於馬鳳遣罪上減一等杖一百徒三  
年景名揚馬萬鵬呂枉據供母老丁單亦應不  
准查辦解配折責安置河北右營守備尹殿英  
訊無需索及故縱情事惟不能先事約束致兵

丁持械行兇毆斃人命又不能將正兇立刻查明卽時交出非尋常失察可比應請

旨交部嚴加議處河南河北鎮總兵官謝金章於拜金科等滋事釀命時業已行過前途數站防範不及已據該總兵自行

奏請議處應毋庸再議署宿州知州事候補通判李承恩先被需索未允後因馬鳳等詈鬧慮恐滋事遲誤不得已給與銀錢竝非違例應付應與前途各處均免察議楊忠徐乾李萬陳沅各傷均已平復景名揚馬萬鵬呂枉聽從馬鳳沿

途需索錢文每處數百文不能記憶確數業已  
隨時花用其與拜鵬丁學禮買玉印陳斗金在  
宿州所得銀錢照數追緣同起獲馬鳳名下贓  
銀一併入官充公無干省釋毆傷差役李萬等  
不知姓名兵丁仍咨豫省再行就近確查務獲  
另辦除錄供咨部外所有審明定擬緣由理合  
恭摺具

奏伏乞

皇上聖鑒勅部議覆施行謹

奏

道光十三年三月十四日具

奏四月初十日奉到

硃批該部速議具奏欽此

此件接准部覆道光十三年四月初四日

刑部奏

云

等語查餘丁崔萬成之父崔大瀧

於嘉慶十八年隨征陣亡歿於王事有母秦氏  
現年五十歲計其守節已二十年家無次丁例  
內雖無流罪人犯查辦明文惟該犯罪止擬流  
竝非死罪人犯既據該督聲明自應准其查辦  
卽令該督行文該犯原籍河南巡撫飭屬查明



是否屬實訊取供結咨部備覈餘均應如該督所奏完結至毆傷差役李萬等不知姓名兵丁應令該督咨明河南巡撫就近確查務獲照例辦理再該督又稱河北右營守備尹殿英訊無需索及故縱情事惟不能先事約束致兵丁持械行兇毆斃人命又不能將正兇立刻查明卽時交出非尋常失察可比應請

旨交部嚴加議處河南河北鎮總兵官謝金章於拜金科等滋事釀命時業已行過前途數站防範不及已據該總兵自行奏請議處應毋庸再議

署宿州知州事候補通判李承恩先被需索未  
允後因馬鳳等詈罵慮恐滋事遲誤不得已給  
與銀錢竝非違例應付應與前途各處均免察  
議等語恭候

命下移咨吏兵二部查照辦理等因本日奉

旨拜金科着卽處斬餘依議欽此